

Si purcite!

Puisie di Pre Zaneto
(Don Giovanni Schif - Porpêt 1872).

Apene e criche l'albe
il capo di famèe
al viârz i voi, ju frèe,
si drezze su in sinton.

Un salt fûr da la cove,
pojât a une cjadrèe
biel sosedant al prèe,
al tire su i bregons.

Vistît, al côr pes cjâmaris,
al vòse, al zoche, al ragne:
- No sano che si scugne
jevà par purcitâ?

I cavales scrizzùlin,
i scus dal jet scrosòpin,
lis feminis valopin,
impîn di strade il fûc.

Boll la cjalderie grande;
intant la mularie
e duâr e s'insumie:
«marne, papà, cicin!».

Il purcitâr al càpite
cui fiârs dal so mistîr,
e plui che vulintîr
al scole un bicjerin.

Si tire su di maniis,
al fume, opur al ciche.
Mentri il purcit al uiche...
lu tirin fûr dal cjôt

pe code e pes orellis:
al muâr e si remene
par no pojâ le schene
sul smondeât breon,

e ribaltà la tripe.
Ma i omps cence creanze,
cui pîs su la so panze,
lu tegnin a dovè.

Il purcitâr si scrofe:
pols fêr, e cui curtis,
cence tremà, i feris
la vene principâl.

Lis feminis e scjâmpin,
no vuelin viodi sanc,
la bestie e rugne a plac
fin quan'che tire il pît.

Culi a Percût contàvin
(per altri no lu crôt)
che il purcitâr plui vecjo,
vuei di Jacun Sabòt,

prime di fa la vore
al si trincave un quart
di sgnape par sveâsi
e fâsi il cûr plui fuart.

Al jentre in t'une cjase
par fa la so funzion;
purtate distirade,
si bùte in zenoglon,

al nete i voi e serio
al cjape in man l'imprest;
la palpe, la cjarezze
j met dut quant a puest.

- Bambine, su cuietiti,
tu sês par pôs momens.
Ferme la man, al smire,
al alze il fiâr: atens!

Al mole il colp di grazie!
Trop dûr l'è il corean,
la lame no va dentri
e i sbrisse fûr di man.

Sâr Jacun al esclame:
- Ce part che mi è tocjade!
Crodevi in cuarp e in anime
di vele foropade!

Uicânt la scrove e scjampe:
al nàs un gran dâi-dâi:
- Fermâile... folc-le-trai!
La brinche pai sghirès.

Al strènz i dinç, i lavris:
rabiôs al tire i voi,
di gnûf al cjape l'arme
e trabasçant: - A noi!

J dà un gran colp... Jè secje!..
«*et plus non buligaris!*»:
no vegnin plui a scuèditi
daziârs e vitrinaris.

Il di che si pucite
tra i pùars de Furlanie
che vebin pûr fastidis
no mancje l'alegrie.

Tant feminis che umin
bâgnin intant il béc,
chè la materie grasse
no côr pal cuel a sec.

I frus no van a scuele,
lâssin ogni altri zùc
par sta sot de la nape
cul fersurin sul fûc.

Sveltis lis signurinis
ramondin i budiei,
e su la pestadorie
la cjâr e cjape il mei!

Fàs i persus, a machine
insàchin i salâmps,
musès, sogò, lujanis,
par quan'che van pai cjamps.

Par disbratà lis voris,
il nestri contadin
al mangje, par fa fuarze,
polente cul cicin.

Un ues o un toc di polpe
che côr su e jù 'tal cit...
Cussì in Friûl si celebre
la fieste dal purcèt.

Ma prin di purcitâlu
par qual si sevi câs,
il fisc e il vitrinâri
e dèvin metì il nâs,

e, l'è clâr, slungjâlu
fin dèntri dal tacuin.
Cui sà che no si trati
di tif o mâl russin?

Si conte: un crep di femine
'e plombe jù in zitât,
un abit dut a sbrendui
fazoletòn scussât;

'tal pîs un par di zùcui,
cinturie rude lane
leade atôr de vite:
vêr tipo di furlane.

-Ah, chest l'è il Municipi!
e lant su pai sejalòns
si smaravèe di viodi
pipins cence bregòns.

Rivade insomp 'e polse...
cjale par ogni bande
e tuche in t'une puarte
'e scolte, e' sint: - Avande!

E viarz la puarte e jentre
cui cjâf: - Siorùt, pardon!
-E che te pozzo fare?
-Sintît ce intonazioni

Saressial chest, di grazie,
l'ufizi dai purcis?
Jo soi culì vignude
par sodisfâ i diris.

Managgia a tutte femmene!
nun saccio che dicite!
-Si pajal culi il dazi,
siôr, quan'che si purcite?

-Aggio capito niente;
caspeta, c'aggio a fâ?
fateme 'stu favore...
subbeto via de qua.

Ritire il cjâf la femine
scussânt un folc-ti-trai;
-El sà mi son furlana,
napoletan no sai.

-I' sto' quase impazzenno:
vi piglierò a cazzotte.
No sai che puare femine
se jè ancjmò che trote.

Percût 1927.